

REGIONAL NEWS

HOSPITALS

Nimin Inrinni khan home minister Pu K. Sapdanga chuan Lungleia damdawi in pahnih - Mizoram Presbyterian Kohhran enkawl John Williams Hospital leh Mizoram Baptist Kohhran enkawl Christian Hospital Serkawn te a tlawh.

John Williams Hospital a tlawhnaah hian, Minister hi Medical Superintendent Dr K. Lalsanga hovin damdawi-ina thawktute'n an lo dawngsawng a, damdawi-in an fan kualpui bakah, an hma lakna hrang hrang an lo hrilh fiah ani. Pu K. Sapdanga chuan damdawi in enkawl chu rawngbawl na pawimawh tak a nih thu sawiin, sawrkarin hma lakna hrang hrang a neihah kohhran leh mimal damdawi-inte'n sawrkar an thlawpna leh thawhpui a that thu a sawi a. John Williams Hospital-a thawktute chu tha taka sawrkar thawhpui zel tur leh mipui hrisel nan theihtawp chhuah chhonzawm zel tura chahin, duhsakna a hlan bawk.

Christian Hospital Serkawn a tlawhnaah Minister hi BCM hnuaia Medical & Health Department Director Dr B. Laldinlana leh damdawi in thawktute'n lo dawngsawngin, an hma lakna hrang hrang an lo hrilh fiah a. Thawktute nen inkawm hona hun buatsaih a ni bawk. Minister chuan Mizoram sawrkarin mipuite'n damloh nikhuuaa inenkawl na tha an dawn theih na'n Mizoram Universal Health Care Scheme (MUHCS) a duang tih sawiin, MUHCS-a siam rem leh en nawn ngaite lo zir chiang tura Review Committee dinah Chairman-a ruat a nih angin damdawi in chu tlawh a nih thu a sawi a. Christian Hospital Serkawn chu MUHCS timawitu leh tiphuisuitu hmasa ber, phur tak leh inhawng taka sawrkar thawhpuitu an nih angin an ngaihlu tak zet tih sawiin, BCM Kohhran leh damdawi in athawktute chungah sawrkarin MUHCS kal tlangin lawm thu a sawi a ni, a ti a. MUHCS chu Mizoram mipuite'n buaina awm lova an chhawr tlan theih thuai a beisei thu a sawi bawk.

Christian Hospital Serkawn hotute chuan MUHCS hnuaia an damdawi-inin bill an neihte chu Mizoram sawrkarin rei rial lovin chawlhkar tin a pek chhuah zung zung thu leh pawisa an dawn that thu sawiin, sawrkar chungah an lawm hle tih an sawi.

Christian Hospital Serkawn hian May ni 21, -ah MUHCS hi hmang tanin, damlo 786 te inenkawl na senso cheng nuai 151.75 chu Mizoram sawrkar atangin an hmu let tawh a. Kar tin chawh rualin cheng nuai 13.2 vel hmu ang an ni.

He hunah hian UD&PA Department kal tlanga Christian Hospital Serkawna damlo awmpuitute riahna tur, 'Patient Attendants Shelter' - mipa 5 leh hmeichhe 5 thlen theihna tur sa tura ruahman chu buaipui mek a nih thu leh fur zawh vele hna tan theih beisei a nih thu tarlan a ni bawk.

POWERLESS

Inrinni chawhma dar 11:00 vel atanga vawiina chanchinthar buatsaih lai vel thleng hian Khawzawl leh Champhai District-in kawlpheha supply an dawng lo.

Kawlpheha awm loh chhan hi power & electricity department thawktuten an chhui mek a. Keifang leh Khawzawl inkar Tuivawl lui kam zel chho velah transmission line chhia awm niin hriat a ni a. Ngawrh taka chhui mek a nih thu dawn a ni. Thu dawn pakhat chuan sawr zim deuhin Saitual leh Vankal inkarah 132KV line a chhia a, tunah hian endik mek a nih thu a sawi. EE, Power & electricity department, Khawzawl division-in Khawzawla kan Corr a hrilh danin Kawlkulh lama R Phase Polymer disc a puncture a, thlak mek a ni a, tluang taka siam theih a nih chuan darkar 1 hnu-ah siam zawh theih beisei a ni.

He tih lai hian East Lungdar khua-in Bukpui atangin kawlpheha an la dawn theih loh avang leh East Lungdar lam atangin kawlpheha an la lak luh thei bawk si loh avangin, eng an neih theih hun tur a la hriat loh niin power & electricity department hnathawkte chuan an sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar puan leh a ni ang.

<><><>

COVID

Tun dinhmunah Mizoramah Covid-19 hri kai enkawl lai an awm lo.

Integrated Disease Surveillance Programme (IDSP) hotute hnen atanga thu dawn danin August ni 8 khan Covid hri kai inringhlel mi 27 endik zingah 1 chuan Covid hri a kai tih hmuhchhuah a ni a. Hemi hnu hian mi 31 sample endik a ni leh tawh chungin nimin thleng khan hri kai hmuhchhuah belh an awm tawh lova. Thawhtanni, August ni 11 khan Covid-19 hri kai enkawl lai 11-te chu an vai a dam taka chhuahtir an ni a, hemi hnu hian Mizoramah hri kai an la awm leh rih tawh lo a ni.

<><><>